

四庫全書

史部

欽定四庫全書

欽定續通志卷五百

列傳

元 五十四

察罕特穆爾

庫庫特穆爾

達實巴圖爾

慶通

伊蘇

徹里特穆爾

納琳

巴延特穆爾

劉哈喇布哈

舒穆魯宜孫

穆爾濟蘇

察罕特穆爾字廷瑞系出北庭曾祖庫庫台元初隨大軍收河南祖崇台父阿魯威皆家河南為潁州沈丘人察罕特穆爾幼篤學嘗應進士舉有時名居常慨然有當世之志至正十一年盜發汝潁不數月江淮諸郡皆陷朝廷徵兵致討卒無成功十二年察罕特穆爾乃奮義起兵沈丘之子弟從者數百人與信陽之羅山人李思齊合兵同設奇計襲破羅山朝廷授察罕特穆爾汝

寧府達魯噶齊於是所在義士俱將兵來會得萬人自成一軍屯沈丘數與賊戰輒克捷十五年賊勢滋蔓由汴以南陷鄧許嵩洛察罕特穆爾兵日益盛轉戰而北遂戍虎牢以遏賊鋒賊乃北渡盟津焚掠至覃懷河北震動察罕特穆爾進戰殲之無遺類河北遂定朝廷奇其功除中書刑部侍郎苗軍以滎陽叛察罕特穆爾夜襲之虜其衆幾盡乃結營屯中年已而淮右賊衆掠汴以西來擣中年營察罕特穆爾結陣待之以死生利害

諭士卒賈勇決死戰賊勢披靡不能支棄旗鼓遁
追殺十餘里軍聲益振十六年升中書兵部尚書繼而
賊西陷陝州斷穀函勢欲趨秦晉知樞密院事達實巴
圖爾方節制河南軍調察罕特穆爾與李思齊往攻之
夜拔穀陵立柵交口險且固賊轉南山粟給食以堅守
攻之猝不可拔察罕特穆爾乃焚馬矢如炊烟狀以疑
賊而夜提兵拔靈寶城守既備賊始覺不敢動即渡河
陷平陸掠安邑蹂晉南鄙察罕特穆爾追襲之賊回扼

下陽津赴水死者甚衆相持數月賊皆遁潰以功加僉
河北行樞密院事十七年賊尋出襄樊陷商州攻武關
直趨長安分掠同華諸州三輔震恐陝西省臺來告急
察罕特穆爾即領大衆入潼關與賊遇戰輒勝賊黨皆
潰走南山入興元朝廷嘉其功授陝西行省左丞未幾
賊出自巴蜀陷秦隴據鞏昌遂窺鳳翔察罕特穆爾即
分兵守鳳翔遣諜者誘賊賊果來圍之察罕特穆爾自
將鐵騎晝夜馳二百里往赴分軍張左右翼掩擊之城

中軍亦鼓噪而出內外合擊賊大潰斬首數萬級餘黨皆遁關中悉定十八年山東賊分道犯京畿朝廷徵四方兵入衛詔察罕特穆爾以兵屯涿州察罕特穆爾即留兵戍清湫義谷屯潼關塞南山口以備他盜自將銳

卒往赴召

按順帝紀至正十八年詔察罕特穆爾屯陝西與本傳異

而曹濮賊方分

道踰太行焚上黨掠晉冀陷雲中雁門代郡烽火數千里察罕特穆爾先遣兵伏南山阻隘自勒重兵屯聞喜絳陽賊果走南山伏兵橫擊之賊皆棄輜重走山谷其

得南還者無幾乃分兵屯澤州塞碗子城屯上黨塞吾
兒谷屯并州塞井陘口以杜太行諸道賊屢至守將數
戰却之河東悉定進陝西行省右丞兼行臺侍御史同
知河南行樞密院事於是詔察罕特穆爾守禦關陝晉
冀撫鎮漢沔荆襄便宜行事察罕特穆爾益務練兵訓
農以平定四方為己責是年安豐賊劉福通等陷汴梁
造宮闕易正朔號召羣盜巴蜀荆楚江淮齊魯遼海西
至甘肅所在兵起察罕特穆爾乃北塞太行南守鞏洛

而自將中軍軍沔池會叛將周全棄覃懷入汴城合兵
攻洛陽察罕特穆爾下令嚴守備別以奇兵出宜陽自
將精騎發新安來援賊至城下見堅壁不可犯遂引去
因追至虎牢塞成臯諸險而還拜陝西行省平章政事
仍兼同知行樞密院事便宜行事十九年察罕特穆爾
圖復汴梁以大軍次虎牢先發遊騎南道出汴南畧歸
亳陳蔡北道出汴東水陸竝下畧曹南據黃陵渡乃大
發秦兵出函關過虎牢晉兵出太行踰黃河俱會汴城

下首奪其外城自將鐵騎屯杏花營諸將環城而壘賊
屢戰輒敗乃夜伏兵城南旦日遣苗軍畧城而東賊出
追伏兵鼓噪起擊敗之又令弱卒立柵外城以餌賊賊
出爭之弱卒佯走因突鐵騎縱擊悉擒其衆賊自是益
不敢出謀知城中食盡乃與諸將議各分門而攻夜斬
闕而入遂拔之劉福通奉其僞主從數百騎出東門遁
走獲僞后及賊妻子數萬僞官五千符璽印章寶貨無
算河南悉定以功拜河南行省平章政事兼知河南行

樞密院事陝西行臺御史中丞仍便宜行事先是中原
亂江南海漕不復通京師屢苦饑至是河南既定江浙
海漕復至察罕特穆爾乃分兵鎮關陝荆襄河洛江淮
而重兵屯太行營壘旌旗相望數千里乃謀大舉以復
山東二十一年謀知山東羣賊自相攻殺而濟寧田豐
降于賊察罕特穆爾乃興疾自陝抵洛大會諸將分道
竝進而自率鐵騎渡孟津踰覃懷鼓行而東復冠州東
昌師至鹽河遣其子庫庫特穆爾及諸將等以精卒五

萬壽東平與東平賊遇兩戰皆敗之直抵其城下察
罕特穆爾以田豐據山東久軍民服之乃遺書諭以逆
順豐及王士誠皆降遂復東平濟寧時大軍猶未渡羣
賊皆聚濟南而出兵齊河禹城以相抗察罕特穆爾分
遣奇兵取間道出賊後南畧泰安逼益都北徇濟陽章
丘中循瀕海郡邑乃自將大軍渡河與賊將戰于分齊
大敗之進逼濟南城而齊河禹城俱來降南道諸將亦
報捷再敗益都兵于好石橋東至海濱郡邑聞風送款

攻圍濟南三月城乃下詔拜中書平章政事知河南山東行樞密院事陝西行臺中丞如故遂移兵圍益都百道竝進賊悉力拒守復掘重塹築長圍過南洋河以灌城二十二年山東俱平獨益都孤城未下田豐王士誠陰結賊復圖叛乃請察罕特穆爾行觀營壘左右請以力士從不許乃從輕騎至其營遂為所刺訃聞帝震悼詔封忠襄王諡獻武及葬賜賻有加改封潁川王諡忠襄封其父阿魯威汝陽王後又進封梁王子庫庫特穆

爾

庫庫特穆爾本姓王小字保保察罕特穆爾甥也自幼
養為子察罕既遇害詔即軍中拜庫庫特穆爾太尉中
書平章政事知樞密院事仍總父兵庫庫特穆爾既領
兵柄銜哀討賊賊守益固乃穴地以入拔其城取田豐
王士誠之心祭其父分兵取莒州山東悉平博囉特穆
爾自察罕特穆爾既沒復數以兵爭晉冀帝雖屢解諭
之而讐隙日深會朝臣魯達實圖沁特穆爾得罪于皇

太子奔于大同為博囉特穆爾所匿帝密令博囉特穆爾隱其迹而丞相綽斯戩宦者保布哈皆附皇太子必窮竟其事皇太子方倚重庫庫特穆爾庫庫特穆爾駐太原與博囉特穆爾構兵相持不可解二十四年詔數博囉特穆爾罪削其官職而奪其兵博囉特穆爾不受詔遂遣兵逼京師殺綽斯戩保布哈復與魯達實圖沁特穆爾兵同犯闕庫庫特穆爾遣部將白索珠以萬騎入衛與戰不利遂奉皇太子奔太原博囉特穆爾入朝

據相位白索珠將二萬騎屯漁陽為朝廷聲援二十五年庫庫特穆爾以太子令舉兵討博囉特穆爾入大同進薄京師帝乃殺博囉特穆爾于朝詔皇太子還京庫庫特穆爾亦扈從入朝拜左丞相居兩月請南還視師是時江淮川蜀多失陷皇太子累請出督師而帝難之乃封庫庫特穆爾河南王俾總天下兵而代之行庫庫特穆爾於是分省以自隨官屬之盛幾與朝廷等而用孫翥趙恒等為謀主二十六年北渡居懷慶又移居彰

德初李思齊與察罕特穆爾同起義師齒位相等及是庫庫特穆爾總其兵思齊心不能平而張良弼孔興圖魯卜等亦皆以功自恃各懷異見莫肯統屬庫庫特穆爾乃遣闕保和爾齊以兵西攻良弼而思齊亦與良弼合兵連不能罷庫庫特穆爾始受命南征顧乃退居彰德又惟務用兵陝西朝廷因疑其有異志初皇太子之奔太原也欲用唐肅宗靈武故事庫庫特穆爾不從及還京師皇后竒氏傳旨令庫庫特穆爾以重兵擁太子

入城欲脅帝禪位庫庫特穆爾知其意比至京城三十里即散遣其軍由是皇太子心銜之及是屢趨其出師江淮庫庫特穆爾遣弟托音特穆爾及部將鄂勒哲摩該以兵往山東而西兵互相勝負終不解帝又下詔和解之顧乃戕殺詔使而跋扈之跡成矣二十七年帝命皇太子親出總天下兵馬分命庫庫特穆爾肅清江淮李思齊進取川蜀圖魯與張良弼孔興圖魯卜等取襄樊王信守山東然詔書雖下皇太子亦竟止不行而分

兵之命庫庫特穆爾終扞拒不肯受於是摩該闕保等皆叛之列其罪狀聞于朝舉兵共攻之皇太子用薩蘭托里特哩實克巴延特穆爾李國鳳等計立撫軍院總制天下軍馬專備庫庫特穆爾以摩該等能倡大義賜號忠義功臣十月詔落庫庫特穆爾太傅中書左丞相依前河南王以汝州為食邑與弟托音特穆爾同居河南府凡庫庫特穆爾所總諸軍在帳前者命白索珠和爾齊領之在河南者李克彛領之在山東者伊蘇領之

在山西者薩蘭托里領之在河北者摩該等分領之庫
庫特穆爾既受詔即退屯澤州詔又命圖魯與李思齊
張良弼孔興圖魯卜率兵東向以正天討二十八年朝
廷命左丞孫景益分省太原關保以兵為之守庫庫特
穆爾即遣兵據太原而盡殺朝廷所置官

謹按通鑑輯覽

御批庫庫特穆爾前與李思齊等兵連禍結尚屬私怨相尋
至是則竟入據太原盡殺朝廷所置官吏顯然相抗直是
叛矣論者或謂庫庫特穆爾後此孤軍塞外猶然力戰不
屈使得角逐中原國事尚未可知而歸其咎於太子挾嫌
輕加削奪壓而為博囉特穆爾之續生致宗社淪亡其所
以責太子者誠當然彼時明兵已盡有山東漸將由汴入

陝即使庫庫特穆爾奮志勤王亦未必即能恢復疆宇中興社稷乃罔恤國家之患不禦外侮而轉成內訌累世忠勤至此而隳
何其鑿也 皇太子乃命魏賽音布哈及闕保以兵與思

齊良弼諸軍夾攻澤州天子又下詔削奪庫庫特穆爾爵邑令諸軍共誅之二月庫庫特穆爾退守平陽闕保遂據澤潞二州與摩該合時李思齊張良弼孔興圖魯卜與庫庫特穆爾相持既久明兵時已及河南思齊良弼乃解兵大掠而歸七月摩該闕保進攻平陽數請戰不出一日謀知摩該分軍掠祁縣即夜出薄其營大敗

其衆摩該關保皆就擒朝廷聞之遽罷撫軍院而特哩
實克已延特穆爾李國鳳等以誤國受黜庫庫特穆爾
因上疏自陳帝亦悔悟下詔滌其前非時明兵已定山
東河洛中原俱不守閏七月帝復命庫庫特穆爾仍前
河南王太傅中書左丞相以兵南討伊蘇趣山東圖魯
出潼關李思齊出七盤金商以圖復汴洛未幾伊蘇兵
潰圖魯思齊兵亦未嘗出而庫庫特穆爾又退守太原
不復敢南向已而明兵迫京城帝北奔國遂以亡及明

兵至太原庫庫特穆爾即棄城遁西奔于甘肅

達實巴圖爾曾祖耨埒祖伊蘇岱爾有傳父囊嘉特以
世襲萬戶鎮守羅羅宣慰司土人作亂捕獲有功舉充
船橋萬戶出征雲南升大理宣慰司都元帥至正十一

年特除四川行省參知政事從平章耀珠討賊於荆襄

按順帝紀達實巴圖爾除陝西行省參政及時耀珠既
耀珠討荆襄事並在至正十二年與本傳異

平江陵達實巴圖爾請自攻襄陽十二年進次荆門用

宋廷傑計招募義丁二萬編排部伍申其約束行至蠻

河賊守要害兵不得渡即令屈萬戶率奇兵由間道出其後首尾夾攻賊大敗追至襄陽生擒偽將三十人斬之賊自是閉門不復出達實巴圖爾乃內列八翼包絡襄城外置八營軍峴山楚山以截其援自以中軍四千據虎頭山以瞰城中城中民受圍日久夜半二人縋城叩營門願為內應約以五月朔四更攻城至期民垂繩以引官軍城遂破偽將王權西走遇伏兵被擒襄陽遂平以其弟寶勒們為襄陽達魯噶齊子博囉特穆爾為

雲南行省理問比賊再犯荆門安陸沔陽達實巴圖爾
輒引兵敗之十三年定青山荆門諸寨畧均房平穀城
破武當山寨數十獲偽將杜將軍進攻峽州破偽將趙
明遠寨升四川行省右丞十四年復峽州升四川行省
平章政事兼知樞密院事總荆襄諸軍五月命伊蘇烏
爾圖華代守中興荆門令達實巴圖爾以兵赴汝寧尋
詔與台哈布哈會軍討安豐復苗軍所據鄭均許三州
又復河陰鞏縣十五年命達實巴圖爾代台哈布哈管

領一應諸王藩將兵馬便宜行事拜河南行省平章政
事進次許州長葛與劉福通野戰為其所敗將士奔潰
至中牟收散卒團結屯種賊復來劫營掠其輜重劉哈
喇布哈來援大破賊兵復駐汴梁東南調兵進討大敗
賊于太康遂復亳州偽宋主小明王遁十六年朝廷差
托歡知院來督兵達寶巴圖爾父子親與劉福通戰不
利移駐陳留攻取夾河賊寨次高柴店偏太康賊乘夜
來劫以有備亟遁火而追之比曉督陣力戰緣城入其

郭斬首數萬擒偽將軍張敏孫韓等九人殺偽丞相王羅二人太康悉平遣博囉特穆爾告捷京師帝賜勞內殿王其先臣二世拜河南行省左丞相仍兼知樞密院事守禦汴梁升實勒們雲南行省左丞博囉特穆爾四川行省左丞十七年詔朝京師加開府儀同三司太尉四川行省左丞相取溝城東明長垣三縣詔遣知院達爾瑪實哩來援為劉福通所殺達勒達諸軍皆潰達實巴圖爾力不能支退駐石村朝廷頗疑其玩寇失機使

者促戰相踵賊覘知之詐為達實巴圖爾通和書遺諸道路使者得之以進達實巴圖爾覺知憂憤死子博囉特穆爾別有傳

慶通字明德喀喇氏祖莽賚特穆爾父烏魯斯皆封益國公慶通以勲臣子孫給事內廷遂長宿衛授太宗正府掌判三遷為上都留守又累遷為遼陽行省平章政事以寬厚為政遼人德之至正十年遷平章行省江浙適時承平頗沉湎于宴樂凡遺逸之士舉校官者輒擯

斥不用由是不為物論所與明年盜起汝潁蔓延江浙
江東浙西郡縣所在不守慶通分遣僚佐以次克復既
乃招徠流離俾安故業發官粟以賑之民賴以存活者
甚衆十四年托克托以太師右丞相統大兵南征一切
軍資甲仗穀粟薪藁之屬咸取具於江浙慶通規措有
方陸運川輸千里相屬朝廷賴之明年盜起無錫慶通
諭以禍福皆投戈解甲請為良民十六年平江湖州陷
義兵元帥芳嘉努屯杭城之北關劫掠財貨白晝殺人

民以為患慶通言于丞相達實特穆爾數其罪斬首以徇民大悅繼而苗軍帥楊謬勒哲守杭城授江浙行省右丞以功自驕求娶慶通女慶通不許時苗軍勢甚張達實特穆爾方倚以為重強為主婚慶通不得已以女與之明年出鎮海寧州居二年召拜翰林學士承旨改淮南行省平章政事未行仍任江浙十八年拜江南行臺御史大夫時南行臺治紹興所轄諸道皆阻絕不通溫台諸郡則制於方國珍杭蘇諸郡則據於張士誠憲

臺網紀不復可振二十年召還朝由海道趨京師拜中

書平章政事

按元宰相年表至元二十年平章政事凡七人而不載慶通與此傳異

有譖

其子噶勒桑私通宮人者帝怒殺之慶通因鞅鞅不得

志移疾家居日飲酒以自遣二十五年詔拜陝西行省

左丞相時李思齊擁兵關中慶通御之以禮待之以和

居三年關陝用寧召還京師二十八年明兵逼京城帝

與皇太子及六宮宰臣近戚皆北奔命淮王特穆爾布

哈監國慶通為中書左丞相以輔之京城破淮王與慶

通出齊化門皆被殺

伊蘇蒙古人個僅有能名由宿衛厯遷宣政院參議至正十四年河南賊芝麻李據徐州伊蘇從太師托克托南征徐州城堅不可猝拔用伊蘇計以巨石為礮晝夜攻之破其南關外城賊遂遁以功除同知中政院事繼又領軍從父太尉伊徹察喇征淮西會賊圍安豐即往援之渡淮無舟因策馬而過賊大駭撤圍去進攻濠州有詔班師乃還升將作院使復從太尉征淮東取盱眙

遷淮南行樞密院副使升同知樞密院事討賊淮州大敗之賊航海襲山東盡有其地伊蘇計賊必乘勝北侵急引兵還擊之復勝兗二州及費鄒曲阜寧陽泗水五縣未幾復泰安州及平陰肥城萊蕪新泰四縣又平安水等五十三寨升知樞密院事討蒲臺賊杜黑兒擒送京師磔之東昌賊將北寇道出陵州伊蒲邀擊之斬獲殆盡復阜城縣詔以軍屯單家橋斷賊北路賊轉攻長蘆伊蘇與戰矢貫左手不顧轉鬪無前殺賊五百餘人於

是分兵下山寨民爭來歸拜中書平章政事改行省淮南雄州蔚州賊繼起伊蘇悉平之知樞密院事劉哈喇布哈所部卒掠懷來雲州欲為亂伊蘇擊滅其首禍者悉降其衆賊陷大寧詔伊蘇討之賊大敗遂拔大寧擒首賊湯通周成等三十五人磔于都市召入覲進知樞密院事既而賊雷特穆爾布哈程思忠等陷永平詔伊蘇出師遂復灤州及遷安縣時遼東郡縣惟永平不被兵儲粟十萬芻藁山積賊乘間竊入堅守不可下伊蘇數

與戰獲偽帥二百餘人復昌黎撫寧二縣擒雷特穆爾
布哈送京師賊乃乞降于參政徹爾特穆爾請命于朝
詔許之命伊蘇退師伊蘇度賊必以計怠我師乃嚴備
以傾之程思忠果棄城遁追至瑞州殺獲萬計賊遂東
走詔還京師拜遼陽行省左丞相知行樞密院事撫安
迤東兵農委以便宜開省于永平總兵如故金復海蓋
乾王等賊竝起伊蘇分兵防其衝突賊乃轉攻大寧為
守將王聚所敗斬其渠魁衆潰皆西走伊蘇慮賊窺上

都即調右丞和琳台提兵護上都簡精銳自躡賊後賊果寇上都和琳台擊破之賊又大潰永平大寧始平乃分命官屬勞來安輯其民使什伍相保以事耕種二十四年博囉特穆爾與右丞相綽斯戩宦者保布哈有怨遣兵犯闕執二人以去伊蘇遂拜中書左丞相博囉特穆爾復犯闕京師大震皇太子統兵迎於清河命伊蘇軍於昌平一軍皆無鬪志不戰而潰皇太子奔太原博囉特穆爾遂入京城為中書右丞相二十五年皇太子

與庫庫特穆爾謀清內難承制調諸省諸王兵入討博
囉特穆爾博囉特穆爾乃分遣伊蘇率兵南禦庫庫特
穆爾部將珠展摩該等伊蘇謀於衆皆謂博囉特穆爾
所行狂悖遂勒兵歸永平西連太原東連遼陽軍聲大
振博囉特穆爾患之遣其將姚巴延布哈以兵往討伊
蘇襲破其軍擒姚巴延布哈博囉特穆爾大恐自將討
伊蘇至通州大雨三日乃還事敗伏誅二十七年詔以
伊蘇為中書右丞相分省山東二十八年明兵取出山

東伊蘇禦於莫州衆潰乃盡掠莫州殘民北遁

徹爾特穆爾阿魯威氏祖父累立戰功為西域大族徹爾特穆爾幼沈毅有大志早備宿衛擢中書直省舍人遂拜監察御史時右丞相特們德爾用事道路側目徹爾特穆爾抗言厯詆其姦特們德爾欲中傷之會山東水鹽課大損除山東轉運司副使甫浹月補其虧數皆足轉刑部尚書京師豪右憚之不敢犯法而以非罪麗法者多所全脫天厯二年拜中書右丞尋升中書平章

政事出為河南行省平章政事黃河清有司以為瑞請聞於朝徹爾特穆爾曰臣忠子孝天下治百姓安乃為瑞餘何益于治盛大饑徹爾特穆爾輒發倉廩賑之乃疏請專擅之罪文宗大悅至順元年雲南布呼叛以知行樞密院事總兵討之所過秋毫無犯賊平賞賚甚厚悉分賜將士師旋除留守上都遷江浙行省平章政事以嚴厲為政部內肅然尋召拜御史中丞風紀大振至元元年拜中書平章政事首議罷科舉又欲損太廟四

祭為一祭監察御史呂思誠等列其罪狀劾之帝不允
時罷科舉之詔已書而未用寶參政許有壬入爭于太
師已延反覆詳辨已延心然其言而議已定不可中輟
乃溫言慰解之翌日崇天門宣詔特令有壬為班首以
辱之有壬遂移疾不出初徹爾特穆爾之在江浙也會
行科舉驛請考官供張甚盛心頗不平故其入中書以
罷科舉為第一事徹爾特穆爾嘗斥武宗為那壁那壁
者猶謂之彼也又嘗以妻弟阿爾和碩女為己女冒請

珠袍等物於是臺臣復劾其罪而已延亦惡其忤已欲斥之詔貶徹爾特穆爾于南安卒于貶所

納琳高智曜之孫睿之子也大德六年納琳以名臣子入備宿衛延祐初累遷至監察御史以言事忤旨仁宗怒叵測中丞多爾濟力救之乃解天曆元年除杭州路總管鋤姦去姦吏畏民說明年改江西廉訪使南昌歲飢納琳遽出廩粟以賑全活甚衆平章政事巴克實呼圖克貪縱不法納琳劾罷之至正七年積官至御史大

夫所薦用御史必老成更事者八年請老不許加太尉
御史劾罷之退居姑蘇十二年江淮盜起帝命為南臺
御史大夫納琳承詔即起仍命兼太尉設僚屬總制江
浙江西湖廣三省軍馬至則修築集慶城郭會杭城失
守淮南行省平章政事實勒們引兵往援納琳止之使
先救宣城乃調典瑞院使托果齊率蒙古軍應之大破
賊于垵下門宣州以安已而賊陷徽州廣德常州宜興
溧水溧陽蔓延丹陽金壇句容略上元江寧游兵至鍾

山集慶甚危納琳乃力疾治兵部署守備遣使求援于湖廣行省平章政事額森特穆爾不應復遣監察御史鄭鄧力促其行額森特穆爾乃引步騎至臺城入候納

琳疾納琳喜即聞于朝已而額森特穆爾戰屢勝

按順帝紀

至正十二年湖廣行省平章政事額森特穆爾駐軍沙河軍潰還京師仍為御史大夫與托克托傳所載畧同
與此互異江浙行省平章政事薩木丹巴勒右丞佛嘉律亦

引兵來會所在羣賊皆敗州郡悉平十三年納琳固請謝事從之命太尉如故乃退居慶元十六年詔以江南

行臺移至紹興復以納琳為御史大夫仍太尉明年移
治紹興十八年赴召由海道入朝阻風而還十九年復
由海道入京山東俞寶率戰艦斷糧道納琳命其子昂
阿及同舟人拒之破其衆於海口抵京師帝遣使勞之
皇太子亦饋酒脯而納琳感疾日亟卒于通州

巴延特穆爾字珍卿唐古鄂摩克氏早備宿衛歷事武
宗仁宗英宗天歷初由太常署丞拜監察御史累遷至
江浙行省平章政事至正十二年斬黃賊徐壽輝兵陷

湖廣侵江東西詔已延特穆爾率軍討之時湖廣平章政事額森特穆爾江西平章政事桑節江南行臺御史中丞曼濟哈雅皆以兵駐太平宿留不進已延特穆爾至乃與俱前敗賊於丁家洲遂復銅陵縣擒其賊帥復池州分遣萬戶普賢努屯陽陵王建中屯白面渡律爾討無為州而自率鎮撫布哈萬戶明安駐池口以防遏上流已而江州再陷桑節死之曼濟哈雅及威順王庫春布哈軍俱潰安慶被圍益急遣使求援諸將欲自守

信地巴延特穆爾曰安慶與池止隔一水今安慶固守
是其節也救患之義我何可緩且上流官軍雖潰然皆
百戰之餘所乏者錢穀器具而已即大發帑藏周之潰
軍皆集兩軍之勢復振安慶之圍遂解十三年賊復攻
池州衆且十萬諸縣應之巴延特穆爾謀于諸將乘賊
新至疲弊分番與戰大敗之擒其偽帥俘斬無算諸縣
復平遂乘勝率舟師以進四戰皆捷進復江州留兵守
之攻蘄州擒其偽帥鄒普泰遂克其城進兵道士洑焚

其柵抵蘭溪口賊之巢曰黃連砦又克而殲之分兵平兩巴河於是江路始通與曼濟哈雅四川行省參知政事哈喇圖左丞桑圖實哩西寧王英實軍合而湖廣左丞巴延布哈等軍皆會分道攻蘄水縣拔其偽都獲偽將相而下四百餘人徐壽輝僅以身免時丞相托克托方總戎南征聞諸賊已破乃分檄諸軍而以巴延特穆爾獨控長江十六年復以軍守池州卒巴延特穆爾持身廉介其為將所過不受禮遺宴犒民不知有兵性至

孝幼養於叔父阿珠事之如親父云

劉哈喇布哈其先江西人個儻好義不事家產居燕趙有年遂為特默齊軍戶至正十二年賴毫盜起朝廷以台哈布哈為河南行省平章政事總兵討之哈喇布哈上書陳十事其七言兵機及攻守方畧台哈布哈大喜即辟為掾史未幾奏除左右司都事俾統前八翼軍為先鋒明號令信賞罰士皆樂為之用料敵成敗所向無失是時達實巴圖爾軍潰于長葛收集散卒復屯中牟

哈喇布哈軍於汴梁南彭子岡有自長葛來者言總兵官已為賊所敗次中牟哈喇布哈曰賊既捷兵必再至我不可不往援遂整兵而前既有使馳報夜四鼓賊從洧川渡河未知其所向哈喇布哈曰是必襲達實巴圖爾營耳我行已緩不及事不若以精銳斷賊歸路覆之必矣於是領軍徐行天未明伏其歸路賊果襲達實巴圖爾營大掠鎗重而回伏軍四起賊大敗盡俘之當是時達實巴圖爾雖以平章政事總大兵而哈喇布哈

功名與之相埒十八年毛貴率賊由河間趨直沽遂犯
瀋州畧柳林直逼幾旬樞密副使達國珍戰死京師大
震哈喇布哈時為同知樞密院事奉詔以兵拒之戰于
柳林貴衆悉潰退據濟南京師乃安後遷河南行省平
章政事卒初哈喇布哈與信州人倪晦同事台哈布哈
為掾史晦涉書史精文墨機識警敏台哈布哈深委任
之言無不從而哈喇布哈或有所論白多沮不行由是
心銜之及台哈布哈事敗走詣求援哈喇布哈不能曲

為保全乃縛其父子送京師致之死時論以是少之

舒穆魯宜孫宋申之御史大夫額森五世孫也父繼祖
為沿海上副萬戶鎮台州皇慶初移鎮婺處兩州馭軍
嚴肅平寧都寇有戰功為學本於經術兼通名法縱橫
天文地理術數方技釋老之說見稱薦紳間宜孫嗜學
問長於詩歌以廕襲父職為沿海上副萬戶守處州及
嫡弟厚孫長即讓職退居台州至正十一年方國珍起
海上江浙行省檄宜孫守温州宜孫即起任事閩寇犯

處州復檄宜孫以兵平之以功升浙東宣慰副使時處
之屬縣山寇並起宜孫復奉省檄往討之至則築處州
城為禦敵計十七年行省丞相達實特穆爾承制授宜
孫行樞密院判官分院治于處州以劉基為其院經歷
蘇友龍為照磨宜孫又辟郡人胡深葉琛章濫參謀軍
事處為郡山谷聯絡盜賊憑據險阻輒竊發不易治宜
孫用基等謀或擣以兵或誘以計未幾皆殲殄無遺類
尋升同僉行樞密院事當是時天下多故所在守將各

自相保浙東則宜孫在處州穆爾濟蘇在紹興為稱首
十八年明兵取蘭谿且逼婺而宜孫母實在婺城宜孫
泣曰義莫重於君親食祿而不事其事是無君也母在
難而不赴是無親也即率胡深等赴援至婺敗績而還
明年明兵入處州宜孫將數十騎走福建境上欲圖報
復而所至人心已散事不可復為歎曰處州吾所守者
今吾勢已窮無所於往不如還處境死亦為處州鬼耳
既還至慶元縣為亂兵所害追封越國公諡忠愍

穆爾濟蘇寧夏人也字善卿至正十四年進士授紹興路錄事司達魯噶齊苗軍帥楊鄂勒哲在杭縱軍鈔掠莫敢誰何民甚苦之俄有至紹興城中強奪人馬者穆爾濟蘇擒斬數人苗軍乃懼不敢復至其境會江南行臺移治紹興檄穆爾濟蘇為行臺鎮撫乃大募民兵為守禦計處州山賊焚掠婺境與舒穆魯宜孫夾攻其巢穴平之省臣達實特穆爾承制授行樞密院判官分院治紹興方國珍遣兵侵據屬邑穆爾濟蘇曰國珍本海

賊今既降為大官而復來害吾民可乎欲率兵往問罪
先遣部將黃中取上虞時朝廷方倚國珍資其舟運糧
而御史大夫拜珠克與國珍素通賂情好甚厚憤穆爾
濟蘇擅舉兵且恐生變使人召至私第與計事至則令
左右以鐵鎚撻死之斷其頭擲廁溷中黃中乃率衆復
讐盡殺拜珠克家人及臺府官掾史獨留拜珠克不殺
御史珍通糾言拜珠克陰害帥臣幾致激變於是詔削
拜珠克官職安置湖州而穆爾濟蘇之寃始白

欽定續通志卷五百

欽定四庫全書

欽定續通志卷五百一

外戚傳

臣等謹按外戚一門唐書以前祇載后妃之父兄弟姪緣帝室之外家故謂之外戚自宋史載柴宗慶王貽永諸人兼及尚主者實始濫觴遼金元史因仍其例登載稍繁考主壻以帝室為外家於外戚之名稍紊然其人大都世臣勲舊因緣貴寵為

國家肺腑之戚又多武臣右階他無可傳比類附登
未為不可五代傳世甚短外戚多不足紀舊史所
無茲亦不復添綴云

唐

獨孤懷恩

武士護

承嗣
三思

韋溫

楊國忠

獨孤懷恩元貞皇后弟之子也

新書作元貞皇后弟也
按下文云弟姑子恐有

天下謂皇貞皇后及隋文帝獻皇后皆懷恩之姑也
據此當從舊書作弟之子為是通鑑同舊書今據改父

整隋涿郡太守懷恩之幼隋文帝獻皇后以姪養宮中
長學書記而居財不訾喜交豪猾博徒為鄆令以疾免
高祖平京師拜長安令帝受禪擢工部尚書遣代韋義
節擊堯君素於蒲州懷恩性貪寡算略數戰無功詔書
切責而懷恩稍怨望帝嘗與戲曰弟姑子悉有天下次
當爾耶懷恩內喜遂懷異志居嘗咤曰我家渠獨女子
富貴耶因與麾下元君寶解令榮靜謀引王行本軍與
劉武周連和割河東以啗之引虞鄉南山羣賊取永豐

倉絕秦王柏壁餉道長驅三輔會夏人呂崇茂殺縣令
應武周帝敕懷恩與永安王孝基等擊崇茂為金剛所
掩諸將皆沒君寶與開府劉讓私侮懷恩曰不早舉
大事以及斯辱故謀寢露及秦王敗武周於美良川懷恩
逃歸帝復命率師攻蒲州君寶聞曰王者不死果然唐
儉知狀

按通鑑不早舉事及王者不死皆君寶語唐儉辭故云唐儉知狀

會武周還劉

讓求罷兵因白發懷恩等姦時行本舉蒲州降懷恩勒
兵入城帝方濟河而讓至具得反狀召而縛之窮索黨

與縊死于獄以首徇華陰市籍其家

武士護字守信則天皇帝之父世殖貲喜交結高祖嘗
領屯汾晉休其家因被顧接後留守太原引為行軍司鎧
參軍及將起事以劉弘基長孫順德統募兵王威高君
雅以弘基等皆背征三衛罪當死將劾繫之士護曰此
皆唐公客若爾必有大嫌威等遂不敢發司兵參軍田
德平亦欲勸威劾募兵狀士護又勸止之及建大將軍
府拜鎧曹參軍從平京師為光祿大夫封義原郡公累

遷工部尚書進封應國公歷利荆二州都督卒贈禮部尚書諡曰定高宗永徽中以皇后故崇贈并州都督司徒周國公咸亨中加贈太尉兼太子太師太原郡王配享高祖廟庭列功臣上后監朝尊為忠孝太皇建崇先府置官屬追王五世后革命更于東都立武氏七廟追冊為帝諸妣皆隨帝號曰皇后先天中有詔削士護偽號仍為太原王廟遂廢始士護娶相里氏生子元慶元爽又娶楊氏生三女長妻賀蘭氏早寡季妻郭氏前死

士護卒諸子事楊禮薄銜之后立封楊氏榮國夫人后
姊韓國夫人于時元慶已官宗正少卿元爽少府少監
兄子惟良衛尉少卿楊諷后上疏出元慶等于外以示
退讓由是元慶斥龍州元爽濠州惟良始州元慶死元
爽流振州乾封時韓國有女在宮中帝尤愛幸韓國卒
女封魏國夫人

按武后傳韓國女封魏國夫人今據增

后內忌甚欲并殺

之會封泰山惟良及弟懷運以岳牧來集上食后寘堇

毒死魏國歸罪惟良等誅之

按通鑑懷運兄懷亮早卒其妻善氏尤不禮于榮國

坐惟良等沒入掖庭榮國令后以他事束棘諷有司改姓虺氏絕

屬籍元爽緣坐死家屬投嶺外后取韓國子賀蘭敏之
為士襲後賜氏武襲封擢累左侍極蘭臺太史敏之烝
于榮國挾愛佻橫多過惡后疊怒暴其惡流雷州表復
故姓道中自經死乃還元爽之子承嗣奉士襲後宗屬
悉原士襲兄士稜士逸士逸字逖有戰功終韶州刺史
承嗣既還擢尚輦奉御尚輦舊書作尚衣襲周國公遷祕書監
則天臨御擢禮部尚書俄以太常卿同中書門下三品

未幾辭位垂拱初以春官尚書同鳳閣鸞臺平章事改
納言拜文昌左相性暴輕忍禍聞左司郎中喬知之婢
竊娘美且善歌奪取之知之作綠珠篇以諷婢得詩恨
死承嗣怒告酷吏殺之殘其家初后擅政中宗幽逐承
嗣自謂傳國及已武氏當有天下即諷后革命去唐家
子孫誅大臣不附者倡義追王先世立宗廟又王元慶
曰梁王謚憲元爽魏王謚德后從父士讓楚王謚僖士
逸蜀王謚節贈兄子承業陳王封元慶子三思為梁王

士讓孫攸寧為建昌王攸歸九江王攸望會稽王士逸
孫懿宗河內王嗣宗臨川王仁範河間王仁範子載德
潁川王士稜孫攸暨千乘王惟良子攸宜建安王攸緒
安平王從子攸止恒安王重規高平王承嗣子延基南
陽王延秀淮陽王三思子崇訓高陽王崇烈新安王承
業子延暉嗣陳王延祚咸安王而承嗣為魏王實封千
戶乃密諭后黨鳳閣舍人張嘉福使洛州人上書請立
已為皇太子后問岑長倩格輔元皆執不可于是怨長

情等皆以罪誅之承嗣罷為特進后決意還太子遷太子太保不得志怏怏憤死謚曰宣子延基襲爵后嫌斥其名更曰繼魏王長安初與妻永泰郡主及邵王私語張易之兄弟事後忿爭語聞后怒令自殺以弟延義代中宗復位侍中敬暉等言諸武不當王帝柔昏不斷又素畏太后欲悅安之更言攸暨三思皆與去二張功纔降一級三思王德靜郡攸暨王壽春郡舊書作樂壽郡王懿宗耿國攸寧江國攸望鄴國嗣宗管國攸宜息國重規鄆國

延義魏國攸緒巢國崇訓鄴國延祚咸安郡皆為公載
德終潮州刺史攸歸厯司屬少卿至齊州刺史事母孝
攸止絳州刺史三人死太后時不及削封延秀初使突
厥為默啜所執不得歸神龍初默啜請和因延秀送款
還封柏國公在衛中郎將宗兄崇訓尚安樂公主數與
宴昵崇訓死遂私侍主後因尚焉以太常卿兼右衛將
軍封恒國公三思死韋后復私延秀故延秀益自肆主
府倉曹參軍何鳳

舊書作符鳳

說曰今天下繫心武家庶幾

再興且識曰黑衣神孫被天裳神孫非公尚誰哉因勸服
皁衣惑衆韋后敗尚與主居禁中格戰良久同斬肅章
門攸望以太府卿舊書作太常卿貶死春州諸武屬坐延秀誅
徙者畧盡

三思當太后時累進夏官春官尚書爵為王契丹陷營
州以榆闕道安撫大使屯邊還同鳳閣鸞臺三品檢校
內史罷為太子少保遷賓客三思性傾諛善迎諧主意
鉤探隱微故后頗信任數幸其第賞予尤渥屈事后所

幸臣為薛懷義御馬倡言昌宗為王子晉後身引公卿歌咏淫汙規不為恥后春秋高厭居宮中三思欲因此市權即建營三陽宮于嵩山興泰宮于萬壽山請太后歲臨幸已與二張扈侍私竊威福工役鉅萬萬百姓愁歎中宗復位進位司空同中書門下三品固辭進開府儀同三司初桓彥範等緩于事不加誅三思因韋后反易國政罷逐五王悉還所斥去者詔羣臣復循太后法三思建言大帝封泰山則天皇后建明堂封嵩山二聖

之美不可廢帝聽其言遂更名五縣曰乾封合宮永昌
登封告成明年春旱遣禱乾陵而雨帝悅遂復崇恩廟
昊順二陵皆置令丞起毬場苑中詔文武三品分朋為
賭帝與皇后臨觀用功不訾人苦之三思既私韋后又
與上官昭容亂內忌節愍太子即與安樂公主謀廢之
太子懼發羽林兵圍三思第并崇訓斬之殺其黨十餘
人三思姦亂竊國忌阻正人與宗楚客兄弟紀處訥崔
湜甘元柬相驅煽又有冉祖雍宋之慈李俊周利用姚

紹之等號三思五狗而趙履溫鄭愔馬構崔日用李愔
託其權勢熏炙內外天下語曰崔冉鄭亂時政以爵賞
自相崇樹凡構大獄汙黜善良破壞其宗天下為蕩然
始韋月將高軫上疏極言三思過惡有司殺月將逐軫
惡地宋憬執奏亦見斥其權大抵如此既死帝為舉哀
以太子首祭三思柩睿宗立斲棺暴尸夷其墓

按此下
舊有懿

宗攸暨二傳懿宗事不足錄
攸暨見太平公主傳今並刪

韋溫者中宗廢后庶人從父兄也后父玄貞厯普州參

軍事后為皇太子妃擢豫州刺史帝幽房陵玄貞流死欽
州妻崔為蠻酋寧承所殺四子洵浩洞泚同死容州后二
女弟逃還京師帝復政詔贈玄貞上洛郡王太師雍州
牧益州大都督溫父玄儼魯國公特進并州大都督遣
使迎玄貞喪詔廣州都督周仁軌討寧承斬其首祭崔
樞樞至帝與后登長樂宮望哭贈鄴王謚文獻廟曰褒
德陵曰榮先四子並贈郡王葬京師溫初試吏坐賊斥
神龍初擢宗正卿遷禮部尚書封魯國公弟滑自洛州戶

曹參軍連拜左羽林大將軍曹國公后大妹嫁陸頌進
國子祭酒仲妹嫁嗣虢王邕滑子捷尚成安公主溫從
弟濯尚定安公主並拜駙馬都尉捷為右羽林將軍景
龍三年溫以太子少保同中書門下三品遙領楊州大
都督見天下事在手欲自殖以牢其權引用支黨不一
公卿雖畏伏然溫無能不如諸武凶而熾也帝崩后專
政畏有變敕溫盡總內外兵守省中又以從子播捷從
弟璿高嵩分領左右羽林軍溫與宗楚客武延秀等說

后謀革命臨淄王討韋氏溫坐斬分捕諸韋子弟無少

長皆死仍夷玄貞及洵等墳墓

按新書此下有王仁皎傳係明皇廢后之父附

載其子守一仁皎父子並無事蹟史惟稱其聚貨皆墨而已今刪

楊國忠貴妃從祖兄父珣母張氏即易之妹少嗜飲博

數旬貸于人無行檢不為姻族齒年三十從蜀軍以屯

優遷新都尉罷去益困蜀大豪鮮于仲通頗資給之從

父玄琰死國忠護視其家因與妹通所謂虢國夫人者

哀其貲至成都擄掄一日費輒盡乃亡去久之調扶風

尉不得志復入蜀劍南節度使章仇兼瓊與宰相李林甫不平聞楊氏新有寵思有以結之仲通因以國忠薦表為推官使部春貢之長安得蜀貨百萬至京師見羣女弟致贈遺諸楊日為兼瓊譽而言國忠善擣蒲玄宗引見擢金吾兵曹參軍閑廐判官兼瓊入為戶部尚書兼御史大夫用其力也國忠稍入供奉常後出專主捕博計算鉤畫分銖不誤帝以為才累遷監察御史林甫興韋堅等獄欲危太子以國忠搏鷲可用倚使按劾乃

慘文峭詆誣讎被誅者百餘族度可以危太子者先林甫意陷之皆中所欲號國居中用事帝所好惡國忠必探知其微帝以為能擢兼度支員外郎不奄歲領十五餘使擢給事中兼御史中丞專判度支時海內豐熾州縣粟帛舉巨萬國忠請在所出滯積變輕齎內富京師又悉天下義倉及丁租地課易布帛以充天子禁藏帝詔百官觀庫物積如丘山賜羣臣各有差錫國忠金紫知太府卿事初楊慎矜與王鉷有隙鉷挾國忠共劾

慎矜抵不道誅由是權傾中外吉溫為國忠謀奪林甫政國忠即誣奏林甫所厚京兆尹蕭炆御史中丞宋渾逐之又忌鉞寵因邢綽事搆之誅死已代為京兆尹悉領其使即窮劾支黨引林甫交私狀牽連左逮數以聞

帝始厭林甫疎薄之先是南詔質子閣羅鳳亡去

按通鑑考

異云南詔傳七年蒙歸義死詔閣羅鳳襲雲南王不云嘗為質子亡歸九年姚州自以張虔陀侵之故反時鮮

于仲通已為益州長史國忠傳與南詔傳相違新舊書皆如此恐誤

帝欲討之國忠薦鮮

于仲通為蜀郡長史率兵六萬

舊書率精兵八萬通鑑士卒死者六萬人與新

書合討之戰瀘州舉軍沒國忠為匿其敗更叙戰功

新書此下

有使白衣領職句按既掩敗敘功豈得復白衣領職舊書通鑑無之今據刪

使仲通表請已

遙領劔南

按新書自請兼領劔南道鑑舊書俱作國忠使仲通表請已遙領劔南今據改

詔拜

劔南節度支度營田副大使知節度事兼山南西道採訪處

置使開幕府引竇華張漸宋昱鄭昂魏仲犀等自佐而

留京師俄拜御史大夫引仲通為京兆尹使司馬李宓

率師七萬再討南蠻為蠻所誘宓死于陣國忠又隱其

敗凡再舉討蠻之軍徵發皆中國利兵風土不便物故

十八九人銜冤毒無敢言者

按再討南蠻事新書總序在後舊書序在未相前與

通鑑合今據改

自恥無功欲解于帝乃使麾下請已到屯外

示憂邊以合上旨實杜言路林甫亦奏遣之及辭泣訴

為林甫中傷妃又為言帝益親之豫計召日及帝在華

清驛騎追還林甫死遂拜右相兼吏部尚書集賢院大

學士崇玄館大學士太清太微宮使節度採訪等使判度

支如故國忠已得柄則窮摘林甫姦事碎其家帝以為

功封衛國公以宰相領選建罷長名榜于銓日即定留

放盡廢故時選格式令創為押例無賢不肖用選深者
先補官牒文謬缺得再通衆議翕然美之故事吏兵部
尚書侍郎分案注擬吏部銓注常三注三唱自春及夏乃
訖復引過門下侍中給事按閱有不可黜之及是國忠
使吏到第預定其員集百官尚書省注唱一日畢以夸
神速明年大選因就第唱補名左相陳希烈隅坐給事
中在旁既對注曰已過門下矣希烈不敢異侍郎韋見
素張倚與本曹郎趨走堂下抱案牒鮮于仲通等諷選

者立碑省戶下以頌德詔仲通為頌帝為易數字以黃金識其處自是資格紛謬無復綱序帝常歲幸華清宮諸楊湯沐館在宮東垣連蔓相照帝臨幸必徧五家賞賚不訾出有賜曰錢路返有勞曰輭腳遠近饋遺閣侍

歌兒狗馬金貝踵疊其門國忠由御史至宰相凡領四

十餘使

按洪邁容齋隨筆云楊國忠為度支郎領十五餘使至宰相凡領四十餘使新舊唐書皆不詳

載其職按其拜相制前銜云御史大夫判度支權知太府卿事兼蜀郡長史劔南節度支度營田等副大使本道兼山南西道采訪處置使兩京太府出納監倉祠祭木炭宮市長春九成宮等使闕內道及京畿采訪處置

使拜右相兼吏部尚書集賢殿崇元館學士監修國史
太清紫微宮使自餘所領又有管當租庸鑄錢等使以
是觀之概可見矣而度支吏部事尤叢夥第署一字不能盡故

吏得輕重顯賅公謁無所忌國忠性復疏悅捷給硃
處決樞務自任不疑盛氣驕愎百僚莫敢相可否官屬
悉苛督勾剝相基又便佞專徇帝嗜欲不顧天下成敗
帝雅意事邊身調兵食取習文簿惡吏任之須索快成
其手不能省視大雨敗稼帝憂之國忠擇善柔以進曰
雨不為災扶風太守房琯上郡災國忠怒遣御史按之

後乃無敢以水旱聞子暄舉明經不中詔曰生子不富貴耶豈以一名為鼠輩所賣侍郎達奚珣大驚即致暄高第俄與珣同列猶叱官不早達遣戍瀘南餉路險乏舉無還者舊勲戶免行以寵戰功國忠令當行者先取勲家凡募法願奮者則籍之國忠歲遣御史迫促郡縣吏窮無以應乃詭設餉召貧弱者密械送之亡者以送吏代故人人思亂安祿山方有寵國忠知終不出已下暴發其反狀帝不之信祿山雖逆久以帝遇之厚不忍

發欲伺晏駕後稱兵俄祿山授尚書右僕射帝恐國忠
不悅故冊拜司空國忠寡謀矜譟謂祿山跋扈不足圖
故幸其必反以取信于帝乃建言請以祿山為平章政
事追入輔政以賈循節度范陽呂知誨節度平盧楊光
翺節度河東已草詔帝使謁者輔璆琳覘祿山未還帝
致詔坐側而璆琳納金固言不反帝謂國忠曰祿山無
二心前詔焚之矣祿山還幽州覺國忠圖已反謀愈急
國忠令客何盈蹇昂刺求反狀諷京兆尹李峴圍其第

捕祿山所善李超安岱李方來王岷殺之貶其黨吉溫于合浦祿山上書自陳條上國忠大罪二十帝歸過于

峴貶零陵太守以慰祿山

按通鑑國忠建言以祿山為平章在天寶十四載二月捕

安祿山所善李超等在三月通鑑舊書皆言既殺李超等祿山惶懼遂反新書前後倒置今據移正祿山

反以誅國忠為名帝欲自將使皇太子監國國忠懼謂女弟等曰太子監國吾屬誅矣因聚泣入訴于貴妃妃以死邀帝遂寢及哥舒翰守潼關按兵守險國忠聞欲反已疑之乃從中督戰翰不得已出關遂大敗降賊書

聞帝召宰相計事國忠先聞難時自以身帥劔南豫置腹心梁益間為自完計請曰幸蜀便帝然之明日遲昕帝出延秋門羣臣不知國忠與韋見素高力士及皇太子諸王數百人護帝進次馬嵬將士疲乏食右龍武大將軍陳玄禮召諸將曰今天下震蕩社稷不守使生人肝腦塗地豈非國忠所致欲誅之以謝天下云何衆曰念之久矣會吐蕃使有請于國忠衆大呼曰國忠與吐蕃謀反衛騎合國忠突出或射中其頰殺之爭取其肉

且盡梟首以徇是時祿山雖據河洛其兵鋒東止于梁
宋南不過許鄧李光弼郭子儀統師河洛若峭函固守
則凶逆之勢不討自斃及哥舒翰出師凡不數日乘輿
遷幸朝廷陷沒兵滿天下毒流四海皆國忠之貽禍也

是時祿山以
下據舊書增

四子暄眊曉晞暄太常卿戶部侍郎聞亂

下馬蹶弩衆射殺之眊尚萬春公主鴻臚卿陷賊見殺
曉奔漢中為漢中王瑀撈死晞及國忠妻裴柔同奔陳
倉為追兵所斬柔故蜀倡也國忠本名釗以圖讖有金

刀帝為改今名

按新書有李脩鄭光
二傳事無足錄今刪

欽定四庫全書

欽定續通志
卷五百一

十七

欽定續通志卷五百一

欽定四庫全書

欽定續通志卷五百二

外戚傳

宋一

杜審琦

審瓊
審進

審肇
惟序

賀令圖

王繼勲

劉知信

劉文裕

劉美

從廣
永年

楊景宗

符維忠

柴宗慶

張堯佐

杜審琦昭憲皇太后兄昆仲五人審琦最長其次審玉
審瓊審肇審進世居常山以積善聞審琦仕後唐為義
軍指揮使天成二年卒審玉前一年卒太祖開國贈審
琦左神武大將軍子彥超

審瓊建隆初授檢校國子祭酒厯左領軍衛將軍改左
龍武軍大將軍遷右衛大將軍乾德間領富州刺史權
判右金吾街仗兼領步軍司事四年卒贈太保寧國軍
節度使謚恭僖審瓊性醇質在公畏慎宿衛勤謹徼巡

京邑里閭清肅人皆稱之景德三年加贈太傅改葬陪陵又贈太師中書令子彥圭

審肇起家授左武衛上將軍檢校左僕射致仕賜第京師領濰州刺史開寶中為右驍衛上將軍出知澶州以未嘗歷郡務命姚恕通判州事以左右之未幾河決鄆濮數郡民田罹水害太祖怒其不即時上言遣使案鞠論恕棄市審肇免歸私第俄復令致仕以濰州刺史月奉優給之七年卒贈太保昭信軍節度謚溫肅景德三

年加贈太傅子彥遵

審進初授右神武大將軍改右羽林大將軍領賀州刺史知陝州就改保義軍節度觀察留後加節度太宗立加檢校太傅太平興國二年許昌裔刺號州据拾使州闕失事上訴詔右拾遺李幹鞠之幹因上言請去郡不復隸藩鎮皆得專達從之四年帝親征河東審進願率所部擊太原帝以審進耆年不許五年契丹入邊帝幸大名勞軍留審進警巡都邑復歸陝加檢校太師改右

衛上將軍尋領靜江節度端拱元年帝親耕籍田審進
預其禮如開府儀同三司卒贈中書令諡恭惠審進鎮
陝二十餘年勸農敦本民庶便之雖居位節制無驕矜
之色人推其醇厚景德三年追封京兆郡王後贈尚書

令子彥鈞彥彬

按此下原有彥圭彥鈞及彥圭子
守元三傳均無事蹟足錄今刪

惟序字舜功審琦曾孫自三班奉職累遷至供備庫使
為梓夔路鈐轄徙懷慶路知邠州又權慶州會任福敗
以騎兵數千繇懷安路破三砦斬首數百級獲牛馬千

計以功領忠州刺史為涇原鈐轄敕巡警邊州改六宅
使知雄州時契丹勤兵燕薊間遣使求割地未至惟序
預得其草以聞累徙大名府路總管改乾州團練使卒
賀令圖父懷浦孝惠皇后兄仕軍中為散指揮使出為
岳州刺史領兵屯三交從楊業出師死于陣令圖少謹
愿隸太宗左右泊即位補供奉官改綾錦副使知莫州
遷崇儀使知雄州領平州刺史充幽州行營壕砦使以
所部克涿州會父死起為六宅使領本州團練使護瀛

州屯兵初令圖在邊十餘年恃舊恩每入奏事多言邊

塞利害及幽薊可取之狀

按續通鑑綱目載令圖上言契丹主少母后專政寵倖用

事請乘其釁以取幽薊

帝信之故有岐溝之敗令圖輕而無謀契

丹將耶律休格

原作遜寧查係律耶休格之字今據遼史改稱名

號裕悅者使

謀紹令圖曰我獲罪本國願歸南朝令圖不虞其詐私

遺重錦十兩既裕悅率衆入侵宋師敗于君子館裕悅

傳言軍中願得見雄州賀使君令圖意其來降即引麾

下數十騎逆之將至帳裕悅據牀罵曰汝常好經度邊

事乃今送死來耶庵左右縛令圖去令圖與其父首謀
北伐一歲中父子皆陷焉是役也武州防禦使高陽關

部署楊重進死之

按此下原附有楊重
進傳今折入忠義

王繼勲孝明皇后同母弟也性凶率無賴以后故為內
殿供奉官都知溪州刺史累遷龍捷右廂都指揮使領
彭州防禦使太祖將討蜀命繼勲戒期將大閱繼勲素
與馬仁瑀不協陰勅部下市白梃將以相圖太祖知之
為出仁瑀密州遷侍衛步軍司事繼勲所為多不法會

新募兵千餘隸雄武多無妻室太祖謂繼勲曰此必有願為婚者不須備聘財但酒炙可也繼勲不諭旨縱令掠子女京城紛擾帝聞大驚遣捕斬百餘人始定時后已崩帝追念后不之罪後復部曲所訟解兵柄為彰國軍留後奉朝請繼勲自以失職常怏怏專以鬻割奴婢為樂一日天雨墻壞羣婢突出訴寃帝大駭命中使就詰之盡得所為不法事詔削爵歸第令甲士守之俄又配流登州未至改右監門率府副率開寶三年命分司

西京繼勲殘暴愈甚彊市民家子女備給使小不如意即殺食之太宗立命知雜事雷德驥乘傳往鞠之繼勲具伏手所殺婢百餘人乃斬洛陽市及女僧男子為彊市子女者僧廣惠者常與繼勲同食人肉令折其脛斬之其後家寓西洛潁陽孫惟德不肖不能自立丐食以給真宗憫之授汝州司士參軍

劉知信字至誠邢州人父遷晉鳳翔帳前軍使改滑州奉國軍校從驍將皇甫暉禦邊有功早卒母即昭憲太

后妹也乾德初封京兆郡太君六年進本郡太夫人開
寶三年卒追封齊國太夫人陪葬安陵贈遷太保知信
三歲而孤宣祖憐其敏慧建隆初起家授供奉官轉六
宅副使開寶間遷軍器庫使掌武德司領錦州刺史屬
郊祀西洛為行宮使駐洛中又為西京武德皇城宮苑
等使車駕出郊充大內留守太宗即位進領本州團練
使拜武德使從征河東為行宮使太平興國中坐市竹
木矯制免算左授軍器庫使進為皇城使坐秦王廷美

事改右衛將軍出為靜難軍節度行軍司馬起為左衛將軍領營州刺史雍熙初改左神武軍將軍檀州團練使護屯兵于鎮州會大舉出師為押陣都監師還諸將失道知信獨整所部歸俄知定州兼兵馬鈐轄押大陣右偏一日宴犒將士契丹騎至知信不介而去追之數十里斬獲甚衆就拜邕州觀察使四年召入改并州路副都部署端拱中代還知杭州淳化四年又知天雄軍府咸平初拜建武軍節度觀察留後知永州軍府契丹

入侵復知天雄軍真宗北巡充駕前副都部署歷知河陽昇州車駕幸澶淵命為東京都巡檢使復知定州以疾求還京至鎮州卒贈太尉天平軍節度知信以戚里被親任中外踐歷最為舊故以循謹聞子承宗承渥按此

下原有承宗傳附載承渥並無事蹟足錄今刪

劉文裕字以寧祖正晉幽州營田使兼平州刺史簡穆皇后兄也父審奇武牢關使從討李重進死審奇三子長文遠建隆中為供奉官與并人戰萬善沒次即文裕

起家補殿直權管雲騎員僚直預討江南中弩矢神色
自若太宗在藩邸多得親接太平興國二年擢為內弓
箭庫副使出為秦隴巡檢有李飛雄者太保致仕鱗之
孫性兇險縱酒蒲博常往來京師魏博間與無賴游處
以其父任秦州判官故盡知倉庫所積及地形險易兵
籍多少又有妻父張季英為鳳翔藍屋尉飛雄自京師
往省之因乘季英馬詐為使者夜抵廐置呼卒索馬卒
秉炬出迎不能辨即授以馬一卒乘一馬前導以巡邊

為名因矯詔驅巡驛殿直姚承遂隴州監軍供奉官王
守定吳山尉盧贊皆從行時秦州屬羌為寇朝廷遣周
承瑨田仁朗等及文裕領兵屯清水縣飛雄至自稱上
南府時親吏宣制盡縛之承瑨等見姚承遂數輩同至
不覺其詐仁朗獨號泣求詔書飛雄叱之曰我受密旨
以若輩逗撓不用命令盡誅汝豈不聞封州殺李鶴耶
詔書汝豈得見先是帝即位分命親信于諸道廉官吏
善惡以聞嶺南使者言封州李鶴不奉法誣奏軍吏謀

反詔即誅之故飛雄引以為言將械承璿等詣秦州戮之因據城叛文裕曰我亦嘗依晉即使者豈不營救之乎飛雄低語謂文裕曰爾能與我同富貴否文裕覺其詐偽許之即釋其縛文裕策馬前附耳語仁朗仁朗佯墜馬若卒中風眩狀飛雄共前視之又釋其縛仁朗奮起搏飛雄與文裕共擒之遂秦州獄鞠得實與承遂守定贊坐要斬夷飛雄家文裕後遷軍器庫使四年與通事舍人王侁分兵控石嶺關七年為高陽關都監契丹

萬餘騎入與大將崔彥進擊卻之雍熙初徙屯三交加
領順州團練使會李繼遷率折遇乜寇邊擊走之及從
潘美出師坐失將楊業削籍配隸登州俄起為右領軍
衛大將軍領端州團練使遷容州觀察使出為鎮州兵
馬部署端拱元年卒于屯所贈寧遠軍節度弟文肅文
質劉美字世濟益州華陽人本姓龔以銀銀為業明肅

皇后以美為兄因改姓劉

按宋史明肅后傳載后幼孤鞠于外氏蜀人龔美攜之至

京師入襄邸真宗即位為美人以其無宗族乃以美為兄故美改姓劉宋史因此遂以后祖父履賢像美傳殊

失事實今據后傳初事真宗藩邸以謹力被親信即位及東都事畧刪改

補三班奉職再遷右侍禁咸平中為自京至陳頴巡檢石保吉在陳州大治廨舍修城壁不以聞會有言其擾民者遣美廩其狀美曰保吉世受國恩列藩閫營繕過度誠或有之自餘保無他患帝意解歸朝充閤門祇候大中祥符二年護屯兵于漢州歷遷供奉官徙嘉州士卒有病皆給醫藥親撫循之名還改內殿崇班提點在京倉場東西八作司以舉職聞遷洛苑副使八年預修

大內以勞改南作坊使同勾當皇城司天禧初遷洛苑
使領勤州刺史與周懷政聯職未嘗阿附懷政左右有
過必痛繩之親從卒偵邏者按籍分番次均使焉帝屢
欲委之兵柄以皇后懇讓中輟數四三年授龍神衛四
廂都指揮使領昭州防禦使改侍衛馬軍都虞候五年
加武勝軍節度觀察留後卒贈太尉昭德軍節度子從

德從廣

按從德附傳但載歷官恩澤別無事蹟足錄今刪

從廣字景元少侍仁宗左右太后愛之如家人子太后

崩真拜崇州團練使娶荆王元儼女為滁州防禦使元
昊反從廣自言不能扞患坐耗縣官願上所給公使錢
帝嘉納之為羣牧都監改副使特拜宣州觀察使同勾
當三班院請補外自効知洺州漳水溢從廣穿隋故渠
以殺水勢洺人便之徙邢州籍鄉軍之罷者聽引子弟
自代著為令召還復領三班院出知襄州徙真定府路
馬步軍副都總管卒贈昭慶軍節度使諡忠惠從廣性
謹飭然喜交士大夫時頗稱之

從德子永年字君錫生四歲授內殿崇班許出入兩宮
仁宗使賦小山詩有一柱擎天之語以為奇童常置內
中年十二始聽出外累遷廬州團練使陝州都監郭邈
山等為盜密遣壯士夜渡河殺凶桀二十餘人衆遂散
遷鈴轄代還召見擢幹辦皇城司改單州團練使永興
軍路總管契丹遣使來請帝繪像選副張昇報使契丹
以未得志夜取巨石塞驛門衆皆恐永年數有力手擲
棄之契丹驚以為神出知涇州郡兵歲以香藥為折吏

三司不時輦致振武卒素驕突入通判聽事請以他物
代語不遜永年數其罪斬為首二人餘不敢動同提舉
在京諸司庫務知代州契丹取西山木前守不敢遏永
年遣人焚之一夕盡契丹移檄捕縱火盜永年曰盜固
有罪然發在我境何預汝事乃不復言英宗立遷沂州
防禦使復知代州歷遷邕州觀察使步軍副都指揮使
卒贈崇信軍節度使謚莊恪

按宋史此下有馬季良傳
季良娶劉美女微倖得官

又有郭崇仁傳係章穆皇
后弟均無事足錄今刪

楊景宗字正臣章惠皇太后從父弟少補博無賴以罪
隸致遠務章惠入宮為美人奏補茶酒班殿侍累遷東
染院副使章惠為太后進崇儀使領連州刺史揚州兵
馬鈐轄未幾授秦州刺史徙滑州鈐轄歷舒州團練使
兵馬總管章惠崩遷成州防禦使改天雄軍副都總管
時呂夷簡守魏常以禮飭戒景宗肆志不悛奏貶齊州
都監徙衡州又徙鄆州鈐轄召還章獻章懿二后并祔
太廟特拜徐州觀察使給留後奉逾年領軍頭引見司

出知磁州為建寧軍節度觀察留後知潞州領皇城司
坐衛士入禁中謀亂貶徐州觀察使知濟州還提舉萬
壽觀復原官又坐從卒王安挾刃入皇城謫左監門衛
大將軍均州安置起為汝州鈐轄祀明堂覃恩願還所
改官求為郡帝曰景宗性貪虐老而益甚郡不可予也
乃復以為建寧軍留後提舉在京諸司庫務卒贈安武
軍節度使兼太尉諡莊定景宗暴戾所至為人患復使
酒任氣在滑州嘗毆通判王述仆地帝深戒無飲酒景

宗雖書其戒坐右頃之輒復醉其奉賜亦隨費無餘始宰相丁謂築第敦教坊景宗為役卒負土第中後謂敗仁宗以其第賜景宗居三十年乃終

符維忠字正臣彥卿曾孫也以外祖母賢靖大長公主廕為三班奉職後擢閤門通事舍人勾當東排岸司三司使寇瑊繩下急漕米數不足綱吏卒率論自盜惟忠爭曰在法欠不滿四百者不坐若以自盜論則計直八百即當坐徙矣瑊怒惟忠爭愈力如所議乃已遷提點

開封府界縣鎮公事宰相王曾外孫樂誥為開封主簿
惟忠以無善狀不肯薦既而誥果以賊敗時吳奎為長
垣尉惟忠厚遇奎白府薦之惠民河與刁河合流歲多
決溢惟忠自宋樓鎮碾灣橫隴村置二斗門殺水勢以
接鄭河圭河自時無復有水害陝西用兵除涇原路兵
馬鈴轄兼知涇州三司使鄭戩奏留都大管勾汴河使
建議以為渠有廣狹若水濶而行緩則沙伏而不利于
舟請即其廣處束以木岸三司以為不便後卒用其議

再遷西上閤門使副富弼往報契丹求地使至武彊縣
疽發背卒贈客省使眉州防禦使

柴宗慶字天祐大名入祖禹錫鎮寧軍節度使父宗亮
太子中含宗慶尚太宗女魯國長公主升其行為禹錫
子拜左衛將軍駙馬都尉領恩州刺史禹錫卒真拜康
州防禦使改復州舊制諸公主宅皆雜買務市物宗慶
遣家僮自外州市炭所過免算至則盡鬻之復市于務
中自是詔罷公主宅所市物從祀汾陰為行宮四面都

巡檢進泉州管內觀察使又自言陝西市村木至京師
求蠲所過稅真宗以私奪小民利不許既而河東提點
刑獄劾宗慶私使人市馬不輸稅貸不問授武勝軍節
度觀察留後歷拜彰德軍節度使仁宗即位拜同中書
門下平章事出判鄭州以縱部曲擾民召還奉朝請歲
減公用錢四百萬久之卒贈中書令諡榮密主累封楚
國大長公主先宗慶沒宗慶歷官多過失性極貪鄙積
財鉅萬而薄于自奉無子及終願以貲產送官仁宗以

其女尚幼不許

按宗慶貪鄙委瑣其傳本不足錄緣有詔罷公主宅祿買務市物及禁止市木

黜稅奪民利事足見當時

約飭戚里善政存以備考

張堯佐字希元溫成皇后世父也舉進士歷憲州筠州

推官吉州有道士與商人夜飲商人暴死道士懼而遁

為邏者所獲捕繫百餘人轉運使命堯佐覆治盡得其

寃改大理寺丞知犀浦縣犀浦地狹民繁多田訟堯佐

正其疆界條衆敝以曉之訟遂簡知開州還判登聞鼓

院時溫成方為修媛欲以門閥自表異故堯佐稍進用

權開封府推官又提點府界公事未幾遷三司戶部判
官累遷兵部郎中權知開封府加端明殿學士拜三司
使明年諫官包拯陳升之吳奎言比年水冒城郭地震
借助法制刑敝實自堯佐仁宗祀明堂改戶部侍郎尋
拜淮康軍節度使羣牧制置使宣徽南院使景靈宮使
賜二子進士出身拯等復言陛下擢用堯佐羣口竊議
宜斷以大義亟命追寢必不得已宣徽節度擇與一焉
御史中丞王舉正留百官班欲廷議不許是日堯佐辭

宣徽景靈使從之未幾復以宣徽使判河陽舉正又抗

章論之至于三

按續通鑑綱目堯佐復除宣徽使知河陽唐介獨抗言之貶介春州別駕王舉

正言其太重
與此互異

時吳育判西京留臺河陽民訟有不決者

多詣育育于狀尾判曲直堯佐畏恐即奉行之召還徙鎮天平軍卒贈太師堯佐持身謹畏頗通吏治曉法律以戚里進遽至崇顯戀嫖恩寵為世所鄙子山甫

欽定四庫全書

欽定續通志
卷五百二

六

欽定續通志卷五百二